

paga, a page 8 a l'anno, et sia governor de quele fantarie.

Item, Batista da Leze corso con fanti 150 et ducati 30, et uno altro sia electo per Colegio con fanti 100, et a Nicolò da Cataro qual è de li con fanti 50 li sia mandà altri 50, si che l'habbi 100, et in tutto a Corfù siano fanti 550 *ut in parte*, et il Collegio habbi libertà mandar altri 500 fanti, i qual habi 2 page qui e 2 a Corfù. Ave: 183, 3, 9.

Noto. Per Pregadi fu preso et scritto, che Zuan da Como di primi capitani habiamo, qual è governor in Candia, zonto sia li domino Zuan Tiepolo vengi con li fanti là a Corfù et non se parti, dove haverà l'ordine nostro: mo è stà fato questa mutation non me piace.

Fu posto, per li Consieri, Cai di XL et Savi dil Conseio et Terra ferma, atento li camerlenghi de Comun non hanno danari da pagar salariadi et altre spexe ordinarie, siano tolti ducati 1500 de le tanse poste, la mità a la cassa de sier Marco Marzelo che è al presente, et la mità a la cassa di sier Julio Contarini, siano dati per pagar quanto è dito de sora. Andò le parte senza parlar. Ave la prima volta: 8 non sinceri, 97 de no, 95 de la parte; la seconda: 2 non sinceri, 53 de no, 144 de la parte, et fo preso de no, perchè el Conseio non vol se fazi, di danari per le occorrentie de l'armada, dispensar in altro.

Fo stridà far avogador de Comun in Gran Conseio, in luogo de sier Francesco Morexini ha auta podestaria a Brexa, et il primo Pregadi proveditor a Cividal de Friul.

Fo chiamà a la Signoria li proveditori sora le Pompe, ai quali è comesso la cosa de fuogi, et il Serenissimo li disse che non atendevano a la leze, non è scale ni sechii ni altro in Rialto, come vol la parte. Et stato fin hore 3 de pote et più, fo licentià el Conseio.

A dì 9. La matina. Fo lettere di Crema, dil podestà nostro, di 4, el sumario lo scriverò qui avanti, et da *Milan di 3*.

Vene in Collegio l'orator de Franza, per saper de novo: li fo dito non era niente.

Vene l'orator cesareo, al qual, per el Serenissimo, li fo dito quanto el Papa havia parlato in concistorio per l'imprestado posto al clero per far quello femo a beneficio dil Stado nostro, et come havemo scritto una lettera scusandosi, la qual mandemo a li oratori nostri apresso quella Cesarea Maestà, però Soa Magnificentia scrivi *etiam* lui; disse faria, ma che l'ha lettere di Roma de questo, che

el Papa poi inteso questa lansa posta stete do zorni aspetar se l'nostro orator li diceva niente avanti el parlasse de questo in concistorio, et vedendo non esserli ditto niente, parloe etc.

Vene l'orator dil duca de Milan et comunicò li avisi da Milan havemo *etiam* nui.

Vene l'orator de la comunità de Ragusi, nominato domino . . . , et tolse licentia, se vol partir, ringratia la Signoria et di la letera fatoli et dil presente datoli.

Vene sier Vincenzo Capello electo capitano zeneral da mar, et parlò assai zerca armar et proveder de zurme.

Da poi disnar, fo Conseio di X con la Zonta, et 288*

Fo etiam in le do Quarantie Criminal et Zivil vechia per expedir el caso tutto de sier Polo Nani, per sier Anzolo Cabriel avogador extraordinario, menato sier Agustin Nani de sier Polo come absente, ma è stà sempre qui perchè l'ave salvoconduto de star fin el padre fosse expedito, hora è in uno monasterio, et lo menoe dicendo non volse dar uno libro di so padre, dicendo l'era brusato etc., et se absentò, poi lo dete fuora. Hor posto per lui et compagni el procieder, 16 non sinceri, 18 de la parte, 38 de no, et fu assolto, et fu ben fato. Le opposition fu fate al predito sier Agustin Nani fu prima l'absentia soa, poi haver iurato haver el libro de so padre, et la terza de esser sta conscio de manzarie dil padre.

Fo dito hoi esser zonto uno orator dil Signor turco in Histria, che vien in questa cità.

In questo Conseio di X con la Zonta fono su partesele non de importantia, et sopra alcuni zudei è a Corfù, che quel rezimento dubita de qualche intelligentia habbino con Turco, et volevano farli venir di quà sotto specie de monetari, ma fu parlato che de prima toleseno il constituto, et vedendo esser in qualche sospitione li debbano mandar di qui.

Item, nel Conseio semplice fu preso una parte: che si alcun . . .

A dì 10, domenega. La matina, se intese uno caso seguito in la contrà de San Canzian drio la chiesa, che zobia de note fo a di 8 de questo una compagnea nominata . . . Mathia . . . la qual haveva madre vechia et una puta de anni 8 et stava in una caxa pagava ducati 5 de fito, et havia danari se dice da ducati 60 et 5 anelli d'oro et bona roba in caxa et vesture de seda; hor da uno suo berton